

Aunc memia baul per scriver giu

Ils campiadis mundials ein la finamira dil currider da cuorsa liunga Toni Livers

DA GIUSEP VENZIN / ANR

■ **Toni Livers ha entschiet la sesiun cun il 52avel plaz a Gaellivare. Dalla staziun da sport el center dalla Laponia ha il currider da 28 onns pil pli bunas regurdientschas. Avon dus onns era el daventaus dudischavel ella cuorsa da 15 kilometers stil liber e quart culla staffetta e pauc pli tard haveva il guardiacunfin scret historia da sport svizra.** Ensemen cun *Dario Cologna*, *Curdin Perl* e *Remo Fischer* haveva *Toni Livers* gudignau la staffetta a La Clusaz en Frontscha. Uonn ha ei denton dau ina trumpada e per la prestaziun mediocra alla emprema cuorsa dil cup mundial dalla sesiun currenta ha igl um che habitescha a Tavau ina semplia stgisa, denton ina stgisa reclia: «Miu tgerp ha dau neu nuot quei di.» Pervia da diesch secundas ch'el ha spiars sil Songaglies *Remo Fischer* ha Toni Livers munchentau la qualificaziun per la staffetta. En quella staffetta ha igl Uranes *Roman Furger* fatg furori ed ei vegnius all'arrivada sco quart. Quei munta gia la qualificaziun dalla staffetta pils campiadis mundials a Val di Fiemme ell'Italia e Toni Livers spera d'esser leu alla partenza. Che quei savess tuttavia esser il cass ha el mussau ina jamna suenter Gaellivare. A Kuusamo, 400 kilometers egl ost da Gaellivare e sin territori dalla Finlanda, han quater secundas muncau per far ils emprems puncts



Toni Livers ha buc entschiet la sesiun sco previu. Tuttina constatescha el che la fuorma ei en uorden.

KEYSTONE

dil cup mundial ella sesiun nova. Toni Livers ei daventaus tierz dils Svizzers. «A Kuusamo sun jeu mai currius bein e sun cuntents cul 34avel rang. En scadin cass sai jeu che la fuorma ei buna.» A Val di Fiemme drova la staffetta in currider da reserva ed aschia astga il Sursilvan cun raschun specular sin in plaz da partenza en ina cuorsa.

Ils campiadis mundials el center

Culla segirtad che tut ei en uorden ei il currider da Rossignol turnaus a Tavau e seprepara per il Tour de ski che fa uonn fermada e Müstair. A Tschier ha ina cuorsa da sprint el stil liber liug da Daniev. «Il percurois dil Tour de Ski da quest onn cunvegn a mi meglier che quel dils onns vargai. Jeu sperel che la sanadad fetschi quella ga buc in streh tras il quen.» Quei ei stau igl onn vargau il cass ed el ha interrutt il Tour de ski.

Ils campiadis mundials ellas Dolomitas ein uonn el center. Quels han liug dils 20 da fevrer tochen ils 3 da mars. Toni Livers sto aunc sequalificar pils campiadis e las caschuns ein plitost scartas. Ils 4 da schaner ei ina da quella caschuns el rom dil Tour de ski. Ella cuorsa da persecuziun da 35 kilometers da Cortina a Toblach less il currider da Trun mussar ch'igl ei aunc memia baul da scriver giu el. Ina autra caschun fust la cuorsa da Tavau miez fevrer. La cuorsa da 15 kilometers el stil liber haveva el gudignau

il 2007. Ils 15 kilometers ein sia distanza favorisada. La cuorsa cuort avon ils campiadis vala denton buca sco qualificaziun. Quei ei denton negin motiv da buca mussar ina buna prestaziun avon agen publicum.

Ch'el seigi aunc buca da scriver giu haveva il currider che viva dapi il temps da gimnasia a Tavau era encurschiu la stad el trenament. Els camps da trenament el tunnel da neiv ad Oberhof en Tiaratudestga e sil Glatsher dil Schnalstal el Tirol dil sid ha el saviu sepreparar sco giavischau silla sesiun. Ella preparaziun ha Toni Livers fatg entginas midadas, mo el conceda: «Da niev hai jeu buc inventau la roda.»

Ils campiadis a Sedrun

Igl unviern vargau ei Toni Livers separticipaus pliras ga cun success a cuorsas popularas da Worldloppet. Uonn ha il cup mundial prioritad, buc il davos sin giavisch dils responsabels da Swiss Ski. Aunc buca segirs ei il currider sch'el ei la fin da schaner a Sedrun alla partenza dil Surselva Maraton. Dalla cuorsa dil Swiss Loppet eis el igl ambassadur. «Quei dependa dil program da preparaziun.» A Sedrun ei il currider ina jamna avon Pastgas alla partenza dalla cuorsa da 50 kilometers dils campiadis svizzers. Il 2009 haveva el gudignau a Sedrun il trel els campiadis organisai dil Club da skis Trun.

LITTERATURA

Il Gion Barlac a Sumvitg



(ac) Oz, ils 13 da december allas 20.00 prelegia igl autur *Theo Candinas* da sia ovra reedida «Las historias da Gion Barlac» ell'Ustria dalla Staziun a Sumvitg. Igl autur relata vinavon da sias experiencias fatgas avon prest quater decennis a caschun dall'emprema publicaziun che ha procurau per diversas reacziuns. La Chasa Editura Rumantscha ha possibiliteitau ina nova ediziun bilingua e quei a moda stampada e sco cudisch auditiv. Il cudisch auditiv vegn prelegius da *David Flepp* (romontsch) e *Gian Ruff* (tudestg) ed enramaus musicalmein da *Peter Conradin Zumthor* (percussiu). L'occurrentza a Sumvitg vegn moderada da *Gaby Degonda* e per igl accumpignament musical procura *Remo Arpagaus*.

SURUA

Davos credit

(gv/anr) Alla davosa radunanza communal dalla vischnaunca lumneziana Surua han ils presents approbau la construcziun d'in local da pumpiers ad Uors-Planezzas e concediu in credit da 560 000 francs pil project. La segirada da baghetgs contribuescha ina cumpart da 44% vid ils cuosts dil baghetg.

Telefonia mobila da Sunrise funcziuna puspei

Dapi ier funcziunan ils telefonins dalla clientella da Sunrise puspei a Sedrun

DA SUSI ROTHMUND / ANR

■ **Cuntrari all'informaziun che la Sunrise ha dau stiarsas all'anr fuvu in'antenna ad Andermatt la raschun per l'interrupziun dalla telefonia mobila si sum la Surselva.** Buca l'antenna sil Tgom – ch'ei drizzada ora viers Andermatt – quella funcziuni senza problems: Senza colligiaziun cun Andermatt mava tuttina nuot. Dapi ier sa la clientella dalla Sunrise puspei telefonar a Sedrun.

Ussa duei in'otra antenna – numnamein quella ad Andermatt enstagl da quella a Sedrun – esser il motiv per l'interrupziun dalla telefonia mobila da Sunrise sisum la Surselva. Sco motiv pil disturbi numna *Tobias Kistner*, il plidader da medias dalla Sunrise, aunc adina las nevaglias. Bravas nevadas che han curclau cuolms e vals ed era las installaziuns dils auters offeriders, mo quels che telefoneschan sur lezs han giu negins in-

caps. La clientella dalla Sunrise ha stuii star varga ina jamna senza colligiaziun. Sco *Tobias Kistner* ha declarau seigi ei buca stau pusseivel da contonscher avon l'antenna ad Andermatt. Igl unviern seigi quella contonschibla sulet cun helicopter e quei seigi stau pusseivel per il mardis. Lu hagian ils tecnicists saviu deliberar quella dalla neiv ed ussa funcziuni ella puspei. La colligiaziun seigi denton aunc adina buc optimala e funcziuni mo cun restricziuns. Sche biars hospes che telefoneschian cun Sunrise vegnien a Sedrun la fin d'jamna savessi ei danovamein dar problems.

Ina pegna e nova direcziun

Sco *Tobias Kistner* ha informau han ils tecnicists denton anflau ina soluziun pil futur. Tier l'antenna pertuccada ad Andermatt dueigi ei vegnir installau ina pegna per far luar la neiv. L'antenna a radis dirigi sil Tgom sur Sedrun dueigi

da niev era vegnir drizzada viers Cuera, aschia ch'ella fussi colligiada cun Andermatt ed aunc cun ina antenna a Cuera. Uonn ei la telefonia mobila dalla Sunrise gia stada interrutta enzacontas ga. Enzacons dis il schaner, lu puspei igl october, il november e sco davos dapi ils 4 da december tochen ier. Avon 15 onns fust quei buca stau in grond problem, mo ussa che tuts ein disai d'esser contonschibels adina e dapertut sevilenta la gronda part dalla clientella. Sche la reit dalla Sunrise vegn vinavon interrutta pervia da mintga féffa neiv – e neiv dat ei adina puspei tier nus – lu savess la reacziun dils collaboraturs dalla firma da baghegiar da *Heinrich Berther* a Mustér forsa far scola. Sco il Radio Rumantsch ha communicau il mardis han numnamein 20 collaboraturs dalla firma *Berther* visau il contract dalla Sunrise e midau tier la Swisscom ed els ein buc ils sulets.



Ils clients dalla Sunrise a Sedrun san puspei telefonar.

FOTO S. ROTHMUND

Concert da Nadal dil Center da formaziun Surselva

■ (anr) Dumengia proxima, ils 16 da december 2012 ha liug ella baselgia claustrala a Glion allas 14.30 in concert da Nadal dil Center da formaziun Surselva. Las treis partziuns dalla scola da musica, la scola media (FMS) e la scola vinavon han formau in chor ad hoc e preparau in concert communabel cun canzuns da Nadal. Accumpignaus vegn il chor dils scolasts *Christian Müller* al clavazin, *Clau Maissen* al saxofon e *Corsin Stecher* alla ghitarra. La direcziun schai els mauns da *Daniela Candrian*, *Albert Spescha* e *Claudio Simonet*.

Dapi 2011 exista il Center da formaziun Surselva. Ina dallas intenziuns ei d'organisar occurrenzas cumineivlas denter ils differents tips da scola. Il concert da Nadal ei l'emprema activitad musicala en collaboraziun dallas classas da musica e da lur persunas d'instrucziun. Igl ei in'acziun ch'unescha internamein las scolas e dat era anoviars in maletg reuniu dil Center da formaziun Surselva.

Il chor ad hoc ha preparau las pli bielas canzuns da Nadal e seprenta aschia ensemen cugl accumpignament instrumental cun in program legriveil da tempr divertenta. Las parts communablas ein enrihidas cun denterparts solisticas cantadas d'affons e giuvenils che han instrucziun da cant solistic, mo era mintga classa per sesezza ei d'udir sco variaziun dil program. La claustrala dallas soras dominicanas a Glion ei in liug ideal per il concert da Nadal. La biala atmosfera cun la stalla da Nadal da sora *Anita Derungs* duei esser igl invit ad in bi mument contemplativ e musical il temps d'advent.

Il chor ad hoc dil Center da formaziun Surselva ei presents a Turitg la sonda, ils 15 da december tier la retscha da concerts Christmas Tree. Las produzioni han liug sut tshiel aviert sil plaz *Werdemühle* allas 14.30 ed allas 15.30 sco era allas 17.30 ed allas 18.30. Ils varga 50 affons e giuvenils representan aschia il cantun Grischun a Turitg en ina bein enconuscha seria da concerts da Nadal. Entrada gratuita.